

四庫全書

經部

# 欽定四庫全書

經部  
經稗卷八

詳校官監察御史臣施朝幹

給事中臣溫常綬覆勘

總校官原任中允臣王燕緒

校對官庶吉士臣吳裕德

謄錄監生臣徐瑤

欽定四庫全書

經緯卷八

宛州府知府鄭方坤撰

春秋傳

受牒

左氏傳王子朝之亂晉命諸侯輸周粟宋樂大心不可  
晉士伯折之乃受牒而歸今世臺府移文屬郡曰牒蓋  
春秋時霸主於列國已用之矣

鶴林  
玉露

昭公孫齊

春秋之世列國之君失守社稷其國皆即日改立君無  
虛位以俟者惟魯昭公為季孫意如所逐而孫於齊又  
適晉凡八年乃沒意如在國攝事主祭歲具從者之衣  
屨而歸之於乾侯公薨之明年喪還故國然後其弟公  
子宋始即位他國無此比也豈非魯秉周禮雖不幸逐  
君猶存厥位而不敢絕之乎其後哀公孫於越左傳終  
於是年不知悼公以何時立也

客齊  
隨筆



吳越

列國之變極於吳越通吳以疲楚者晉也通越以撓吳者楚也春秋於是終焉唐以南詔攻吐蕃而唐之亡以南詔本朝以女真滅契丹而中原之亡以女真女真之將亡也吾國又不監宣和而用夾攻之策不知春秋之

義也

困學紀聞

吳弑其君僚

其不書吳光弑而書吳弑者非貫光也莒僕弑父晉荀

偃轡書弑君未聞有可賞之罪而文十八年莒弑其君  
庶其成十八年晉弑其君州蒲史文詳略如是矣蓋既  
有策書則苟無首從皆可虛其名以按其實以中無彼  
此可推卸也胡氏謂諸樊之國遽致不受則國宜之光  
而不宜子僚故稱國以弑而不歸獄於光則賞光矣且  
授受大事於此不明則千秋篡案終古未決如宋宣讓  
穆則穆之子馮反弑宣子諸樊讓弟則諸樊之子又得  
弑僚似乎是非無一定者按禮運云大人世及以為禮

世者傳子及者傳弟也蓋三古授受祇有傳子傳弟二法而要之傳弟之法終歸傳子舍傳子而求他法則篡弑矣故夏周傳子殷商傳弟然傳弟之窮即傳子以繼之如沃丁傳弟太庚則太庚子小甲立小甲傳弟雍已雍已傳弟太戊則太戊子仲丁立其始於傳弟而終於傳子殷三十王一轍也蓋父傳子兄傳弟者順也弟傳兄之子則逆矣兄傳弟父傳子總一制也至叔父傳姪則變制矣是以宋穆傳目夷則變制啟亂闔廬弑君僚

則大逆不道有明景泰帝既正位號則自宜易儲其不幸而復辟者偶然耳此禮不明遂有執吳光之說以懲忠肅者因舉授受之大法以并正之

春秋毛氏傳

### 魯陪臣交叛

春秋昭公十二年冬十月公子慙出奔齊十三年春叔弓帥師圍費記南蒯之叛也定公八年冬盜竊寶玉大弓九年夏得寶玉大弓記陽虎之叛也十年夏叔孫州仇仲孫何忌帥師圍郕秋叔孫州仇仲孫何忌帥師圍

郤記侯犯之叛也左氏續經哀公十五年春王正月成  
叛記公孫宿之叛也蒯與虎叛季氏犯叛叔孫氏宿叛  
孟氏大夫僭也而陪臣叛之宜若為義雖然家臣而欲  
張公室披邑以資敵國罪莫大焉此南蒯諸人之名春  
秋所以沒而不書也季氏專政僭於公室至平子越禮  
尤甚子仲謀去之而未克南氏先叛無論家臣君圖恤  
湫兆敗而謀之不終以費奔齊是豈忠信之義乎蒯仲  
既敗之後季氏益張昭公謀欲去之而越在外野俾昭

公不能正其終定公不能正其始死而無討春秋痛焉  
桓子嗣政家臣陽虎尤而效之專執國命拘桓子於國  
既復辱之於晉陷之於齊且盟且誚旦暮得而甘心焉  
是時齊方伐魯疆場多故虎乃恣肆無忌順祀先公作  
難蒲圃琴如甲起說然不懼判白之璋繡質之弓青純  
之龜任其攘竊而魯國莫能禁矣孔子為司寇以為欲  
靖內亂必先平齊夾谷會而三田歸虎是以不安於齊  
而適晉也侯犯宰郈公山不狃宰費皆倚城自固勢同

尾大犯雖平而不狃猶在憂未歇也仲尼曰三家之抗魯也以三都故陪臣之抗三家也亦以三都故大都耦國不如墮之墮郈克費女樂入孔子行而成弗克墮矣夫魯人之於孔子孰不知其聖前此不用必待定公十年始用之者非季孫之真能用孔子也迫於陽虎之徒急名之以救亂亂已靖矣乃且彊公室弱私家三桓能不懼乎公歛陽曰成孟氏之保障也無成是無孟氏也不季氏必曰無費是無季氏也叔孫氏必曰無郈是無叔孫

氏也孔子去矣公誰與謀自是以後三桓益侈公孫宿據成以叛亦莫能病孟氏也孔子之為政也能用魯國而不能容於三家陪臣交叛不足以病三家而適以病魯亦莫如之何也已

釋史

### 公圍成

按三都惟郕費為大郕費既墮則墮成最易且公親圍之而反不克非不能克也郕費叛而成獨不叛不必克也墮郕費所以強叔孫季孫墮成適以弱孟孫不當克



也郈費於全魯形勢不甚相關而成在北門齊人窺我  
便及之故前此昭二十六年公出居郈齊侯假納公之  
說師即圍成經書公圍成是也是為孟氏事小為魯事  
大不可克也況既已墮二則一亦可以已矣胡氏謂孔  
子為司寇而不能墮成以未攝相也然則攝相又不墮

何與

春秋毛氏傳

孔門親卒伍

三代而上文武不分春秋列國軍將皆命卿處則執政

出則將兵載於詩書左傳可考也然此特謂將帥耳乃若卒伍之賤雖賢士亦為之不以為異魯哀公時吳伐魯次於泗上微虎欲宵攻王舍私屬徒七百人三踊於幕庭卒三百人有若與焉杜預云卒終也謂於七百人中終得三百人任行也或謂季孫曰不足以害吳而多殺國士不如已也乃止之此蓋後世斫營劫寨之類而有若亦為之齊伐魯冉求帥左師樊遲為右季孫曰須也弱有子曰就用命焉謂雖年少能用命也冉有用矛

於齊師故能入其軍杜預云言能以義勇也皆孔門高弟而親卒伍之事後世豈復有之

容齋  
四筆

### 春西狩獲麟

狩者冬獵之名春而名狩以周之春即夏之冬也西魯西也麟獸名不恒見者書狩禮例書所獲則文例也據傳西狩於大野叔孫氏車子鉏商獲麟以為不祥而賜之虞人仲尼曰麟也然後取之按麟為靈獸王者之瑞禮運聖王順德則麒麟鳳凰皆在郊俶考經援神契德

至八極則麒麟臻故公羊亦云麟者仁獸有王者則至無王者則不至此時周德既衰明王不作夫子以聖人乘時間出而不得在位此則王者之瑞將以誰應况麟之為物游必擇方翔必擇所今出而被獲則是聖人厄於在下之明驗也此與論語鳳鳥不至河不出圖之歎正相表裏故夫子作春秋而終於獲麟之一時雖春秋紀年當有始終此不惟不終哀公之二十七年且不終哀公十四年之夏秋冬自傷道衰隄然絕筆理固有之

若公羊謂西狩獲麟應夫子受命之符故夫子見麟而作春秋則劉向尹更始等皆以為瑞災不並徵吉凶不兩立既傷災見不得復慶為瑞至况終於獲麟則雖漢儒亦不遵賈逵服虔等皆以孔子自衛反魯始作春秋在哀十一年凡三年而文始成有獲麟之應雖其言亦皆臆見彼此無所憑然其不遵公羊說則顯然也若漢儒謂周在西故夫子欲興西周又謂立言之位在西方麟為西方獸屬金兌為金為言為口則幸而所狩之地

偶在魯西耳萬一在魯東夫子將不作春秋乎至說公  
羊者云此是周亡之災漢興之瑞劉為金刀而漢在西  
夫子豫知而傷之此真妖妄之言東漢符命家所為前  
儒早闢之不足道也

春秋毛  
氏傳

### 所見異辭

孔子生於昭定哀之世文宣成襄則所聞也隱桓莊閔  
僖則所傳聞也國史所載策書之文或有不備孔子得  
據其所見以補之至於所聞則遠矣所傳聞則又遠矣

雖得之於聞必參互以求其信信則書之疑則闕之此其所以為異辭也公子盆師之卒魯史不書其日遠而無所考矣以此釋經豈不甚易而實是乎何休見桓公二年會稷之傳以恩之淺深有諱與目言之異而以書日不書日詳略之分為同此例則甚難而實非矣竊疑所見異辭所聞異辭此三語必有所本而齊魯諸儒述之然其義有三闕文一也諱惡二也言孫三也從前之一說則略於遠而詳於近從後之二說則晦於近而章

於遠讀春秋者可以得之矣漢書言孔子作春秋有所  
褒諱貶損不可書見口授弟子弟子退而異言及口說  
流行故有公羊穀梁鄒夾之學夫喪欲速貧死欲速朽  
曾子且聞而未達非子游舉其事而實之亦烏得而明  
哉故曰春秋之失亂

日知錄

### 春秋書名

春秋立名不始夫子在夫子未脩前早有是名傳稱韓  
宣子來聘觀易象春秋此在昭二年夫子未脩以前之



文而坊記謂魯春秋記晉喪曰殺其君之子奚齊及其  
君卓其文在僖九年夫子且未嘗生也故公羊道聽塗  
說亦云有未脩時春秋見莊七年傳而魯史至西狩獲  
麟後尚有二年共二十六條皆曰此魯春秋文也故孟  
子曰詩亡然後春秋作此夫子春秋也魯之春秋此魯  
春秋也乃徐仲日記又曰曩時春秋記事而已夫子之  
春秋則但志其名而不記其事按周禮內史讀四方之  
事書謂四方之事而讀於王前此記事也若外史掌四

方之志則志解作誌又解作誌謂標誌其名而列作題  
目以告於四方故又曰外史掌達書名於四方其所為  
記即春秋之傳也所為志即春秋經也是以左傳序云  
史官掌邦國四方之事則記也緯書鉤命決曰欲觀我  
褒貶諸侯之志在春秋崇人倫之行在孝經則志也特  
志簡而記煩簡則書之於簡謂之簡書簡者簡也以竹  
為之但寫一行字者煩則書之於策謂之策書聘禮所  
云百名書於策謂百字以上皆書之雖猶是竹牒木版

所為而單策為簡聯簡為策策者冊也以編合竹簡合兩冊為一冊故襄二十五年崔杼弑齊君南史氏執簡以往此簡也書志者也文十五年宋司馬華孫來盟公與之宴辭曰臣之先臣督得罪殤公名在諸侯之策此策也

書記者也

春秋毛氏傳

書入

書狄入衛書楚子入陳不忍諸夏見滅於夷狄故稱入焉書吳入郢楚昭出奔猶有君也申包胥求救猶有臣

也故不言楚書於越入吳國無人焉如升虛邑故言吳

困學  
紀聞

### 春秋葬日

熊朋來曰古者昏葬卜日而未嘗擇日故陰陽拘忌之說不至惑人以春秋所書考之莊二十四年八月丁丑姜氏入是年歲次辛亥八月丙子朔乃初二日也八月為夏正六月初不以月破為嫌文二年二月丁丑作僖公主二月為夏正十二月亦不以月建為嫌至於葬則

經多書其日惟莊九年七月丁酉葬齊襄公閔元年六月辛酉葬莊公文十八年六月癸酉葬文公成元年二月辛酉葬宣公於後世葬日為通如隱三年十二月癸未葬宋穆公桓十七年八月癸巳葬蔡桓侯十八年十二月巳丑葬桓公莊四年六月乙丑葬紀伯姬二十二年正月癸丑葬文姜三十年八月癸亥葬紀叔姬僖二年五月辛巳葬哀姜十八年八月丁亥葬齊桓公二十七年八月乙未葬齊孝公三十三年四月癸巳葬晉文

公文元年四月丁巳葬僖公五年三月辛亥葬成風九年二月辛丑葬襄王十七年四月癸亥葬聲姜宣八年十月己丑葬敬嬴成三年正月辛亥葬衛穆公二月乙亥葬宋文公十五年八月庚辰葬宋共公十八年十二月丁未葬成公襄二年七月己丑葬齊姜四年八月辛亥葬定姒九年八月癸未葬穆姜昭七年十二月癸亥葬衛襄公十一年九月己亥葬齊歸定元年七月癸巳葬昭公十五年九月丁巳葬定公雨不克葬戊午乃葬

卒已葬定如是皆不合後世葬日丁巳雨不克葬而戊  
午葬古人未嘗拘忌可見陰陽家擇日古人所不論但  
卜日取吉而已春秋之葬惟莊公以子般卒而葬緩或  
逾月或三四月即葬後世為陰陽拘忌至數年不葬曷  
不觀於春秋乎

讀禮  
通考

### 左氏書事

左傳書晉惠公背秦穆公事曰晉侯之入也秦穆姬屬  
賈君焉且曰盡納羣公子晉侯烝於賈君又不納羣公

子是以穆姬怨之晉侯許賂中大夫既而皆背之賂秦伯以河外列城五東盡虢略南及華山內及解梁城既而不與晉饑秦輸之粟秦饑晉閉之糴故秦伯伐晉觀此一節正如獄吏治囚蔽罪議法而皋陶聽之何所伏竄不待韓原之戰其曲直勝負之形見矣晉厲公絕秦數其五罪書詞鏗訇極文章鼓吹之妙然其實皆誣秦故傳又書云秦桓公既與晉厲公為令狐之盟而又召狄與楚欲道以伐晉杜元凱注云據此三事以正秦罪



左氏于文反復低昂無所不究其至觀秦晉爭戰二事

可窺一斑矣

容齋  
隨筆

### 左傳易筮

左傳所載周易占筮大抵只一爻之變未嘗有兩爻以  
上者畢萬筮仕遇屯之比初九變也成季將生遇大有  
之乾六五變也晉嫁伯姬遇歸妹之睽上六變也晉文  
公迎天子遇大有乃九三變而之睽叔孫莊叔生子豹  
遇明夷乃初九變而之謙崔杼娶妻遇困乃六三變而

之大過南蒯作亂遇坤乃六五變而之比趙鞅救鄭遇泰乃六五變而之需占者即演而為說然崔杼入於其宮不見其妻叔孫君子於行三日不食殆若專為二子所作也唯陳厲公生敬仲遇觀之否周史曰坤土也巽風也乾天也風為天於土上山也有山之材而照之以天光於是乎居土上杜氏注云自二至四有艮象艮為山予謂此正是用中爻取義前書論之詳矣又有相與論事不假蓍占而引卦以言者如鄭公子曼滿欲為卿王

子伯廖曰周易有之在豐之離晉先穀違命進師知莊  
子曰周易有之在師之臨楚王忼侈子大叔曰在復之  
頤但以爻辭合其所行之事耳至於為嬴敗姬伐齊則  
可等語自是一時探賸索隱非後人所可到也衛襄公  
生子孔成子占之亦遇屯之比與畢萬同雖史朝與辛  
廖之言則異然皆以利建侯為主

容齋  
續筆

### 左傳賦詩

左傳記賦詩者始於僖二十三年秦伯享晉公子重耳

公子賦河水公賦六月公子歷諸國未嘗賦詩乃特見於秦非衰之文安能使公子為此自此至文四年甯武子聘魯公與之宴賦湛露彤弓不辭又不答賦以為肄業及之婉其辭以規魯之僭也十三年鄭伯與公宴於棐子家賦鴻鴈季文子賦四月子家賦載馳之四章季文子賦采芣之四章是魯鄭之大夫皆能賦也成九年季文子如宋致女復命公享之賦韓奕之五章穆姜出於房賦綠衣之卒章襄四年穆叔如晉奏肆夏之三不

拜歌文王之三又不拜歌鹿鳴之三三拜穆叔之不拜  
蓋見甯武子以此施於魯遂以施於晉也八年范宣子  
來聘公享之宣子賦標有梅季武子賦角弓賓將出武  
子賦彤弓魯人嘗以彤弓為甯武子不答矣宣子不敢  
自當以晉先君文公之言故傳稱君子以為知禮十四  
年姜戎為范宣子賦青蠅是年諸侯之大夫從晉侯叔  
向見叔孫穆子穆子賦匏有苦葉叔向退而具舟又衛  
獻公飲孫蒯酒使太師歌巧言之卒章太師辭師曹歌

之十六年晉侯與諸侯宴於溫使諸大夫歌詩必類不見諸大夫何歌亦不見齊高厚之詩不類為何詩也是年穆叔如晉聘見中行獻子賦圻父見范宣子賦鴻鴈之卒章十九年季武子如晉拜師晉侯享之范宣子賦黍苗季武子賦六月穆叔會范宣子於柯見叔向賦載馳之四章二十年季武子如宋賦常棣之七章復命公享之賦魚麗之卒章公賦南山有臺二十六年齊侯鄭伯為衛故如晉晉侯兼享之賦嘉樂國子相齊侯賦蓼

蕭子展相鄭伯賦緇衣晉侯言衛侯之罪使叔向告二  
君國子賦轡之柔矣子展賦將仲子兮乃許歸衛侯二  
十七年鄭伯享趙孟於垂隴七子從君趙孟請賦曰武  
亦以觀七子之志子展賦草蟲伯有賦鵲之責賁子西  
賦黍苗之四章子產賦隰桑子太叔賦野有蔓草印段  
賦蟋蟀公孫段賦桑扈文子告叔向曰伯有將為戮其  
餘皆數世之主也是年楚薳罷如晉晉侯享之將出賦  
既醉叔向曰薳氏之有後於楚也宜哉二十九年襄公

自楚還欲無入榮成伯賦式微是年季札觀樂使工為  
之歌周南召南歌邶鄘衛歌鄭歌齊歌幽歌秦歌魏歌  
唐歌陳歌小雅大雅歌頌是年齊慶封來聘叔孫穆子  
為賦相鼠不知明年慶封來奔使工為之誦茅鷯亦不  
知昭元年楚令尹享趙武賦大明之首章趙孟賦小宛  
之二章是年趙孟叔孫豹入於鄭鄭伯兼享之趙孟賦  
芣苢穆叔賦鵲巢趙孟又賦采芣穆叔曰小國為芣大  
國省穡而用之子皮賦野有死麕之卒章趙孟賦常棣



二年韓宣子來聘公享之季武子賦繇之卒章韓子賦  
角弓武子賦節之卒章季子有嘉樹宣子譽之武子曰  
宿敢不封植此樹以無忘角弓遂賦甘棠宣子曰起不  
堪無以及召公自齊聘於衛衛侯享之北宮文子賦淇  
澳宣子賦木瓜三年鄭伯如楚子產相楚子享之賦吉  
日子產具田備十二年宋華定來聘享之為賦蓼蕭弗  
知又不答賦昭子曰必亡宴語之不懷寵光之不宣令  
德之不知同福之不受將何以在十六年鄭六卿餞宣

子宣子曰二三君子請皆賦起亦以知鄭志子蠡賦野  
有蔓草子產賦鄭羔裘子大叔賦褰裳子游賦風雨子  
旗賦有女同車子柳賦揮兮宣子喜曰二三君子賦不  
出鄭志數世之主也皆獻焉而賦我將十七年小邾  
穆公來朝公與之宴季平子賦采芣穆公賦菁菁者莪  
自昭二十五年宋公享昭子賦新宮昭子賦車轄定四  
年申包胥乞師秦哀公賦無衣自此至左傳終所賦之  
詩惟河水新宮茅鴟轡之柔矣為逸詩餘詩皆存自隱

元年至僖二十三年凡八十五年遂不復有賦詩者惟  
襄昭之間一時能歌詩晉范韓趙三卿魯季孫氏有文  
子武子平子叔孫氏有穆子昭子鄭有七穆子孫是皆  
世卿公族風流文雅聚在百年之間僖公之前既無聞  
昭定之後復絕響想見歌詩必有音譜相傳在人好學  
不好學其人不學則雖齊慶宋華世家簪紱而昏愚  
無知其人好學則秦楚之人有歌詩者楚右尹子革能  
誦析招姜戎言語不通諸華忽歌青蠅使范宣子心服

古人以歌詩肄業今皆廢封華定之流矣

熊氏經說

左氏論字義

左氏春秋論字者數處以毀則為賊而資以守典以止  
戈為武而達於用兵以反正為乏而定伐惡之謀以血

蟲為蠱而立養生之戒

熊氏筆乘

公穀解經書日

孔子作春秋以一字為褒貶大抵志在尊王至於紀年  
叙事只因舊史杜預見汲冢書魏國史記謂其著書文

意大似春秋經推此足以見古者國史策書之常也所謂書日不書日在輕重事體本無所系而公羊穀梁二傳每事斷之以日故室而不通左氏惟有公子盆師卒公不與小斂故不書日一說其它亦鮮今表二傳之語以示兒曹公羊云盆師卒何以不日遠也葬者不及時而日渴葬也不及時而不日慢葬也過時而日隱之也過時而不日謂之不能葬也當時而不日正也當時而日危不得葬也庚寅入邠其日何難也取邑不日桓之

盟不日信之也甲寅齊人伐衛伐不日此何以日至之日也壬申公朝於王所其日何錄乎內也辛巳晉敗秦於穀詐戰不日此何以日盡也甲戌敗狄於鹹其日何大之也子卒何以不日隱之也即位不日穀梁最多卑者之盟不日大夫日卒正也諸侯日卒正也日入惡入者也外盟不日取邑不日大閱崇武故謹而日之前定之盟不日公敗齊師不日疑戰也公敗宋師其日成敗之也齊人滅遂其不日微國也公會齊侯盟于柯桓盟

雖內與不日信也。滕陳人之婦其不日數渝惡之也。癸亥葬紀叔姬不日卒而日葬閔紀之亡也。子卒日正也不日故也。有所見則日。戊辰盟於葵丘桓盟不日此何以日美之也。辛卯沙鹿崩其日重變也。戊申隕石於宋是月六鵠退飛石無知故日之鵠微有知之物故月之乙亥齊侯小白卒此以正其日之何也。壬申公朝於王所其日以其再致天子故謹而日之日繫于月月繫於時其不月失其所繫也。丁未商臣弑其君髡日髡之卒。

所以謹商臣之弑也乙巳及晉處父盟不言公諱也何以知其與公盟以其日也甲戌取須句取邑不日此其日何也不正其再取故謹而日之也辛丑葬襄王日之甚矣其不葬之辭也乙卯晉楚戰于邲日其事敗也癸卯晉滅潞滅國有三術中國謹日卑國月夷狄不日其日潞子賢也甲戌楚子卒夷狄卒而不日日少進也癸酉戰于鞍其日或曰日其戰也或曰日其悉也梁山崩不日何也高者有崩道也鼯鼠食郊牛角不言日急辭



也庚申莒潰惡之故謹而日之也秋公至自會不日至  
自伐鄭也丙戌鄭伯卒於操其日未踰竟也乙亥臧孫  
紇出奔邾其日正紇之出也蔡世子弑其君其不日子  
奪父政是謂夷之冬十月葬蔡景公不日卒而月葬不  
葬者也四月楚公子比弑其君弑君者日不日比不弑  
也甲戌同盟于平丘其日善是盟也內之大事日即位  
君之大事也其不日何也以年決者不以日決也定之  
即位何以日也著之也它釋時月者亦然通經之士可

以默諭矣沙鹿梁山為兩說尤不然蘇子由春秋論云公羊穀梁之傳日月土地皆所以為訓夫日月之不知土地之不詳何足以為喜怒其意蓋亦如此

容齋五筆

### 紀年

春秋之世各國皆自紀其年發之於言或參互而不易曉則有舉其年之大事而為言者若曰會於沙隨之歲叔仲惠伯會卻成子於承匡之歲鑄刑書之歲晉韓宣子為政聘於諸侯之歲是也又有舉歲星而言若曰歲

五及鶉火歲及大梁歲在姬訾之口者從後人言之則何不曰甲子也癸亥也是知古人不用以紀歲也

日知錄

### 改歲改時改月

事有為當代所通尚習聞習見隨人舉及言下輒知此屬某彼屬某不復煩疏解者三正之通於民俗亦其一也予嘗以幽風七月詩言月夏正也言日周正也周禮太宰小宰正月建子也正歲建寅也一篇一官之中已交錯言之然猶曰字有不同也若何以卒歲夏正之歲

也曰為改歲周正之歲也月令季秋曰來歲秦正之歲也季冬曰來歲夏正之歲也十月蟋蟀入我牀下夏正之十月也十月之交朔日辛卯周正之十月也臨卦至於八月有凶商之八月也玉藻至於八月不雨周之八月也月令孟春乘鸞路夏之孟春也明堂位孟春乘大路周之孟春也臣工詩維莫之春周之暮春也論語莫春者夏之暮春也明堂位季夏六月改時與改月也左傳襄十四年正月孟春不改月與時也君牙夏暑雨冬祁

寒不改時即不改氣者也雜記正月日至七月日至改月却不改節者也左傳昭十七年當夏四月建巳也於商為四月建辰也武成惟四月顧命惟四月建卯也郊特牲歲十二月孟子歲十二月建亥也伊訓十有二月三統厯商十二月建子也夏小正十有二月凌人十二月建丑也四代之制連類錯舉昭昭別異然猶曰書有不同也若曾子一人人口中病於夏畦夏夏之夏也秋陽以暴之秋周之秋也趙岐註周之秋夏之五六月盛陽

也郝仲興曰周以五六月為秋陽光燥烈金遇火伏暴之極乾也夫以暴物極乾言有不須五六月之陽者乎同一絳縣人之生正月甲子朔在晉為七十三年在魯則七十四年也同一史蘇之占六年逃明年死在晉則合在魯中隔一年也所以者何用夏正與周正之不同不惟此也昭元年正月趙武相晉國祁午曰於今七年及至秋醫和曰於今八年所以者何昭元年正月仍晉平公十六年十一月昭元年秋則晉平公十七年之夏

或秋也以至三統歷殷十一月戊子後三日得周正月  
辛卯朔周正月殷十二月洛誥傳以十二月戊辰晦到  
明月為夏之仲冬夏仲冬周孟春漢古詩明月皎夜光  
一篇玉衡指孟冬漢以十月為歲首此孟冬乃建申之  
月指改時而言下文秋蟬鳴樹間為明實候故以不改  
者言唐儲光羲詩夏王紀冬令殷人乃正月則又和盤  
托出楊升菴曰唐人不辨而自了然也是也惟宋儒始生  
異說明人出而益滋妄解矣

博湖  
掌錄

稱王去天

春秋有稱王去天者王姚江謂偶爾遺落朱子亦嘗云然思之不爾王非天也加他箇天字見得有一毫不似天處便不是天既可以添便可以去此等處非孔子手段下不得故曰游夏不能贊一詞却非孔子意為之其祖述堯舜憲章文武無一字無所本禮記於君之亡稱天以誅之周禮太師述王行事稱天以謚宜幽便曰幽宜厲便曰厲厲王之子宣王尚賢不敢改也若曰此



天之為也聖人行事有怕人處似不近情理却確不可易如子繼大宗所生父便降服厭於祖也魯躋僖於閔春秋譏之君父一也嘉靖身繼大統便尊興獻於正德之上試思正德在時興獻稱臣否生稱臣而死遂踞其上安乎所以漢朝幾百年尊一部皮毛春秋亦是好的未必即是聖人之意然據之以斷事大樣不走如光武之父始終不敢僭帝號止稱曰南頓君何等嚴肅然光武却似太過既係中興追王有何不可魯閔公既為君雖

弟父也僖公雖為兄既曾為之臣則子也雖叔侄猶然此等事須與同志考據折衷存一篇議論一以聖賢經傳古人成案大儒論斷為準吾輩在今日為今人後人視之便是古人不悖於禮而定於一最有功於名教鄭康成豈必賢於朱子而朱子議祧僖祖廟時不記得康成一畧議論以為遺恨苟得此其有助豈淺鮮哉

榕村語錄

稱國以弑

稱國人以弑傳云罪累上也此義大不穩春秋中諸侯

之有罪者莫過於三靈楚靈晉靈陳靈未嘗書人也此  
是大義例蓋其人當權秉政或計不以實或自己欲掩  
其罪而亂指一人以代其辜或重賂一人以抵其罪我  
國何得依之以蔽其奸然史之闕文孔子所謹即明明  
知為某人亦不便竟以某人實之故作不結之案曰某  
國有人弑君隱然屬之其人其人時自驚心後人又將  
究其人以實之如有賊犯拏不到他亂推一人或買一  
人來抵罪官府不肯與他結案寧可懸以待捕令他終

身不敢出頭露面所以不學春秋無以斷事春秋乃刑書也今之懸案即是此例

榕村語錄

諸侯在喪稱子

凡繼立之君踰年正月乃書即位然後成之為君未踰年則稱子未踰年又未葬則稱名先君初沒人子之心不忍亡其父也父前子名故稱名莊公三十二年子般卒襄公三十一年子野卒是也已葬則子道畢而君道始矣子而不名文公十八年子卒僖公二十五年衛子

二十八年陳子定公三年邾子是也踰年則改元國不可以曠年無君故有不待葬而即位則已成之為君文公元年春王正月公即位成公元年春王正月公即位定公元年六月戊辰公即位桓公十三年衛侯宣公十一年陳侯成公三年宋公衛侯是也所以敬守而重社稷也此皆周公之制魯史之文而夫子遵之者也公羊傳曰君存稱世子君薨稱子某既葬稱子踰年稱公得之矣

日知錄

人君稱大夫字

古者人君於其國之卿大夫皆曰伯父叔父曰子大夫  
曰二三子不獨諸侯然也曲禮言列國之大夫入天子  
之國曰某士自稱曰陪臣某然而天子接之猶稱其字  
宣公十六年晉侯使士會平王室王曰季氏而弗聞乎  
成公三年晉侯使鞏朔獻齊捷於周王曰鞏伯實來昭公  
十五年晉荀躒如周葬穆后籍談為介王曰伯氏諸侯  
皆有以鎮撫王室又曰叔氏而忘諸乎周德雖衰辭不

失舊此其稱字必先王之制也周公作立政之書若侯國之司馬司空亞旅並列於王官之後蓋古之人君恭以接下而不敢遺小國之臣故平平左右亦是率從而

成上下之交矣

日知錄

### 姓氏

姓氏後世不復別但曰姓某氏雖史筆亦然按史記帝紀注引春秋左氏無駭卒羽父請謚與族公問族於衆仲對曰天子建德因生以賜姓胙之土而命之氏諸侯

以字為謚因以為族官有世功則有官族邑亦如之公  
命以字為展氏注者云天子賜姓命氏諸侯命族族者  
氏之別名也姓者所以統繫百世使不別也氏者所以  
別子孫之所自出解春秋者云因生以賜姓者謂若舜  
之媯禹之姁伯夷之姜是已胙之土而命之氏者若舜  
之有虞禹之有夏伯夷之有呂是已於字則叔牙季友  
展無駭臧僖伯是已於謚則文武成宣宋戴惡衛齊惡  
是已於官則司馬司徒之類是已於邑則韓魏趙是已



詳此諸侯既命於天子為某公侯則是命之氏諸侯位卑不得賜姓其有以王父諡及以字為氏或以官以邑既無土可分則姓與氏無別注史記者所以有族者姓之別名之語姓者統百世如周姓姬氏所以別子孫如魯衛毛眡邦晉應韓之分又春秋之時諸侯之子為大夫則稱公子孫則稱公孫公孫之子與異姓之臣未賜族而身為大夫則稱名無駭俠之類是也已賜族而使之世為大夫則稱族如仲孫叔孫季孫之類是也此諸侯

不得命氏而得命族之例也從可知已若夫易云黃帝堯舜氏作堯舜雖非姓氏既是天子當一代稱曰堯舜氏義亦通此又不拘姓氏之例也

雪麓漫鈔

因生賜姓

傳曰因生賜姓胙土命氏及字謚官邑六者而已推廣為十七類一曰以國為氏五帝之前有國者不稱國以名為氏所謂無懷氏葛天氏伏羲氏燧人氏者也神農軒轅雖曰炎帝黃帝猶以名為氏至唐虞夏商周而后

以國為氏諸侯亦然魯衛齊宋之類是也支庶稱氏適他國則稱國如宋公子朝在衛則稱宋朝衛公孫鞅在秦則稱衛鞅三曰以邑為氏原以周邑而得氏申以楚邑而得氏魯有沂邑因沂大夫相魯而以沂相為氏周有甘邑因甘平公為王卿士而以甘士為氏三曰以鄉為氏四曰以亭為氏封建五等降國為邑邑有關內侯鄉侯亭侯關內邑者溫原蘇毛甘樊祭尹之類是也封於鄉者以鄉氏封於亭者以亭氏五曰以地為氏居傳巖

者為傅氏徙稽山者為稽氏主東蒙之祀者為東蒙氏  
守橋山之塚者則為橋氏彤氏因彤班食於彤門穎氏  
因考叔為穎谷封人東門襄仲為東門氏桐門右司為  
桐門氏隱於甫里綺里者為甫里氏綺里氏六曰以姓  
為氏姓之為氏與地之為氏皆因所居而命也得賜者  
為姓不得賜者為地居姚墟者賜以姚居羸瀆者賜以  
羸姬之得賜居於姬水姜之得賜居於姜水七曰以字  
為氏八曰以名為氏諸侯之子稱公子公子之子稱公

孫公孫之子以王父字為氏如鄭穆公之子曰公子駢  
字子駟其子曰公孫夏其孫則曰駟帶駟乞宋威公之  
子曰公子目夷字子魚其子曰公孫友其孫曰魚府魚  
石魯孝公之子曰公子展其子曰公孫夷伯其孫曰展  
無駭展禽鄭穆公之子曰公子豐其子曰公孫假其孫  
曰豐卷豐施天子之子亦然王子狐之後為狐氏王子  
朝之後為朝氏如公子遂之子曰公孫歸父字子家其  
後為子家氏父字為氏者也季孫鉏字子彌其後為公

鉏氏父名為氏者也九曰以次為氏伯仲叔季之類是也十曰以族為氏族近於次者氏之別也孟氏仲氏別兄弟也丁氏癸氏別先後也祖氏禰氏別上下也第五氏第八氏以同居別也孔氏子孔氏旗氏子旗氏字之別也軒氏軒轅氏熊氏熊相氏名之別也季氏之有季孫氏仲氏之有仲孫氏叔氏之有叔孫氏嫡庶之別也十一曰以官為氏太史太師司馬司空是也十二曰以爵為氏皇王公侯是也十三曰以諡為氏莊氏出於楚

莊王康氏出於衛康公魯僖公宣公之後為僖氏宣氏  
文武哀繆皆是也十四曰以吉德為氏趙衰人愛之如  
冬日後為冬日趙氏古有賢人為老成子後為老成氏  
十五曰以凶德為氏英布被黥為黥氏楊感梟首為梟  
氏十六曰以事為氏夏侯氏遭有窮之難后緡方娘逃  
出自竇而生少康支孫以竇為氏漢武帝詔丞相田千秋  
乘小車出入省中後因以車為氏十七曰以技為氏  
巫者之後為巫氏以至卜氏匠氏豢龍御龍干將氏者

亦莫不然三代之後姓氏混矣

隨隱  
漫錄

五伯

五伯之稱有二有三代之五伯有春秋之五伯左氏成  
公二年齊國佐曰五伯之霸也勤而撫之以從王命杜  
元凱云夏伯昆吾商伯大彭豕韋周伯齊桓晉文孟子  
五霸者三王之罪人也趙臺卿注齊桓晉文秦繆宋襄  
楚莊二說不同據國佐對晉人言其時楚莊之卒甫二  
年不當遂立為五亦不當繼此無伯而定於五也其



通指三代無疑國語祝融能昭顯天地之光明其後八  
姓昆吾為夏伯大彭豕韋為商伯莊子彭祖得之上及  
有虞下及五伯李軌注彭祖名鏗堯臣封於彭城歷虞  
夏至商年七百歲是所謂五伯者亦商時也是知國佐  
以前其有五伯之名也久矣若孟子所稱五伯而以桓  
公為盛則止就東遷以後言之如嚴安所謂周之衰三  
百餘歲而五伯更起者也然趙氏以宋襄並列亦未為  
允宋襄求霸不成傷於泓以卒未嘗霸也史記言越王

句踐遂報彊吳觀兵中國稱號五伯子長在臺卿之前  
所聞異辭然則言三代之五伯當如杜氏之說言春秋  
之五伯當列句踐而去宋襄荀子以桓文及楚莊闔閭  
句踐為五伯斯得之矣

日知錄

霸者先服鄭

齊晉楚之霸皆先服鄭范雎李斯之謀皆先攻韓蓋虎  
牢之險天下之樞也在虢曰制在鄭曰虎牢在韓曰成  
皋虢叔恃險而鄭取之鄭不能守而韓滅之韓又不監而

秦并之秦之亡也漢楚爭之在德不在險佳兵者好還

信夫

困學紀聞

楚興衰

楚之興也筭路藍縷其衰也翠被豹舄國家之興衰視

其儉侈而已

困學紀聞

周不能有其寶

周之大寶鎮河圖大訓列焉易象在魯三墳五典在楚周不能有其寶矣然而老聃之禮甚弘之樂文獻猶存

及王子朝以典籍奔楚於是觀射父倚相皆誦古訓以華其國以得典籍故也區區一鼎與懷璧同其能國乎

困學  
紀聞

### 宋稱商

日知錄武王伐紂第二則云武王克商不以其故都封周之臣而仍以封武庚及武庚既叛乃命微子啟代殷而必於宋焉蓋不以叛逆疑其子孫而明告萬世以取天下者無滅國之義也故宋公朝周則曰臣也周人待

之則曰客也自天下言之則侯服於周也自其國人言之則以商之臣事商之君無變於其初也平王以下去微子之世遠矣而曰孝惠娶於商曰天之棄商久矣曰利以伐姜不利於商吾是以知宋之得為商也按左傳哀二十四年孝惠娶於商此宋人繫夏對魯哀公之言宋林氏註曰稱商不稱宋者避定公諱也此解絕妙寧老獨未見耶僖二十二年楚人伐宋以救鄭宋公將戰大司馬固諫曰天之棄商久矣君將興之弗可赦也已

不曰棄宋而曰棄商者此即下文寡人雖亡國之餘之意亦即一姓不再興之說也今取以證宋得為商竊恐寧老未識當時立言之意因僖二十一年宋人為鹿上之盟以求諸侯於楚公子目夷曰小國爭盟禍也宋其亡乎此處斷宜稱宋則彼處稱商正可意會哀九年晉趙鞅卜救鄭遇水適火史龜曰是謂沈陽可以興兵利以伐姜不利于商不曰伐齊與宋而變文言姜言商者取與上文陽兵協韻此固古人文字之常只觀下文伐

齊則可敵宋不吉二語不用韻協便直稱齊宋本號則

可見矣

潛丘  
荆記

### 魯不亟從盟

諸侯之主盟自齊桓始也北杏鄆之會魯不至及幽之  
盟而始會焉則魯不亟於從霸也夷狄之主盟自楚靈  
始也申之會魯不至及遠啟疆之召而後如楚焉則魯  
不亟於從狄也故曰魯一變至於道

困學  
紀聞

### 三傳不同

春秋五傳而騶夾二氏不傳所傳者左氏公羊穀梁而已韓退之詩有春秋五傳束高閣之句五字疑三字傳寫之誤耳三傳所紀率多牴牾如僖公八年用致夫人不言姓氏左氏以為哀姜公羊以為聲姜穀梁以為成風以哀姜為說者則以哀姜既絕於魯又殺於齊當與魯絕不當以夫人禮之以禘致為非禮以聲姜為說者則以聲姜僖公夫人今乃歸於廟僭也以成風為說者則以成風者莊公之妾僖公之母僖公為君故得與祭



又如隱公時夫人子氏薨或以為隱公母或以為隱公夫人其說紛紜不同如此

野客叢書

### 人有十等

凡婢役於婢者俗謂之重臺按左氏傳昭公五年日之數十故有十時亦當十位自王以下其二為公其三為卿注云日中為王食時為公平旦為卿雞鳴為士夜半為皂人定為輿黃昏為隸日入為僚晡時為僕日昃為臺暘日中出闕不在第等王公曠其位又昭公七年天

有十日人有十等故王臣公公臣大夫大夫臣士士臣  
皂皂臣興興臣臺則所謂臺者十等之至卑今豈非本  
是與然加以重字尤有意

輟耕錄

左傳害理處

左傳議論遣辭頗有害理者以文章富豔之故後人一  
切不復言今略疏數端以箴其失傳云鄭武公莊公為  
平王卿士王貳於虢杜氏謂不復專任鄭伯也周公闕  
與王孫蘇爭政王叛王孫蘇杜氏曰叛者不與也夫以

君之於臣而言貳與叛豈理也哉晉平戎於王單襄公如晉拜成劉康公徵戎將遂伐之叔服曰背盟而欺大國不義晉范吉射趙鞅交兵劉氏范氏世為昏姻甚弘事劉文公故周與范氏趙鞅以為討夫以天子之使出聘侯國而言拜成謂周於晉為欺大國諸侯之卿跋扈於天子而言討皆於名分為不正其他如晉邢侯殺叔魚叔魚兄叔向數其惡而尸諸市其於兄弟之誼為弗篤矣而託仲尼之語云殺親益榮杜氏又謂榮名益已

以弟陳尸為兄榮尤為失也

容齋  
三筆

王貳王叛

王貳於虢王叛王孫蘇曰貳曰叛於君臣之義失矣不可以訓通鑑書燕叛齊而大事記非之書蜀漢寇魏而綱目非之書晉寇梁而讀史管見非之況天子之於臣乎

困學  
紀聞

鄭商人賈人

秦人謀襲鄭鄭商人弦高以乘韋先牛十二犒師鄭人

有備秦人無功而晉得迎而敗之於穀於是鄭穆公以存國之功賞弦高辭遂與其屬徙東爨終身不返荀瑩之在楚也鄭賈人有將置諸褚中以出既謀之未行而楚人歸之賈人如晉荀瑩善視如實出已賈人曰吾無其功敢有其實乎吾小人不可以厚誣君子遂適齊夫士君子之見利忌義者莫不鄙之為商賈之行乃前一商人建莫大之功後一賈人具莫大之德有士君子之所不及者而皆出自鄭豈有賢人而隱於商賈者乎

晉韓宣子買玉環於鄭商子產曰昔我先君桓公與商人皆出自周庸次比耦以艾殺此地斬之蓬蒿藜藿而共處之世有盟誓以相信也則知鄭之商賈實異於他之商賈者也

四傳  
權衡

戴嬌息嬌

夫沉機深智隱忍觀變遂因敗為功報讐而雪恥者在男子猶足稱焉况閨中之少婦有不見褒彤管而流美來茲乎吾於春秋得二人一曰衛之戴嬌一曰息之息

媯則皆陳產也衛莊姜美而無子戴媯生桓公而莊姜  
子之及州吁弑桓公戴媯於是乎大歸莊姜送之為之  
賦燕燕按史記世家州吁好兵衛人皆不愛石碻乃因  
桓公母家於陳佯為善州吁至鄭郊石碻與陳侯共謀  
使右宰醜進食因殺州吁于濮蓋陳人方從州吁之請  
而興之伐鄭又何以忽從石碻之請而反誅州吁向非  
一女子矢志必報而婉孌轉移於幃幄之間則擊鼓其  
鏜踴躍用兵之大慙豈能若是授首之捷哉息媯蔡哀

侯之姨也哀侯艷息媯以語楚子楚子滅息以息媯歸  
生堵敖及成王三年不言楚子問之對曰吾一婦人而  
事二夫縱弗能死其又奚言楚子以蔡侯滅息遂入蔡  
哀侯留九年死於楚使息媯戀燕爾之新婚忘故家之  
板蕩則獻舞勿賓楚王入享亦已付之往事矣撲滅燎  
原之火者伊何人乎以莊姜之凝脂瓠犀而偏能降心  
以相從以蔡侯之極口艷稱而令楚子之食指亦動豈  
非兩媯者治逸姣好為千古之豐於色者乎又孰知其



謀之深而慮之摯也然兩媼皆陳產也昔者虞思妻少  
康以二姚則謀澆誘豷遂滅過戈不可謂二姚之無內  
助豈大舜號泣旻天而流放竄殛有堅忍之心有雄斷  
之手其國法不傳於子而傳於賢不傳於子而傳於後  
之女子也禹之後有少康又有越王句踐皆報讐雪恥  
之男子舜之後有二姚又有戴媼息媼皆報讐雪恥之  
婦人固不可謂非家傳也

春秋  
志在

乘驛乘遽

漢書高帝紀乘傳詣雒陽師古曰傳若今之驛古者以車謂之傳車其後又單置馬謂之驛騎竊疑此法春秋時當已有之如楚子乘驛會師於臨品祁奚乘驛而見范宣子楚子以驛至於羅汭子木使驛謁諸王楚人謂游吉曰吾將使驛奔問諸晉而以告國語晉文公乘驛自下脫會秦伯於王城呂氏春秋齊君乘驛而自追晏子及之國郊皆事急不暇駕車或是單乘驛馬而註疏家未之及也謝在杭五雜俎曰古者乘傳皆驛車也史

記田橫與客二人乘傳詣雒陽註四馬高足為置傳四馬中  
足為馳傳四馬下足為乘傳然左傳言鄭子產乘遽而  
至則似單馬騎矣釋文以車曰傳以馬曰遽子產時相  
鄭國豈乏車乎懼不及故乘遽其為驛馬無疑矣漢初  
尚乘傳車如鄭當時王溫舒皆私具驛馬後患其不速  
一縣乘馬矣

日知錄

有人無人

臧孫於魯曰國有人焉師慧於宋曰必無人焉襄仲於

秦曰不有君子其能國乎有士五人晉文所以霸也有  
大叔儀有母弟鱄衛獻所以入也有趙孟有伯瑕有史  
趙師曠有叔向女齊晉所以未可媿也曰子無謂秦無人  
曰無善人則國從之國之存亡輕重視其人之有無而  
已舜有臣五人武王有亂臣十人殷有三仁周有八士  
之人也始可謂之有虞有官之奇項有范增不能有其  
有矣魏之窺吳則曰彼有人焉賈生言天下倒縣則曰  
猶為國有人乎此皆以人為盛衰也

困學  
紀聞

男子稱寡

王制曰老而無妻謂之鰥老而無夫謂之寡鰥寡老年  
不復嫁娶之名孝經注丈夫六十無妻曰鰥婦人五十  
無夫曰寡知此為限者以內則妾雖年老未滿五十必  
與五日之御則婦人五十不復御明不復嫁矣正義謂知  
稱寡以此為斷然婦人無稱鰥之文男子亦稱寡左傳  
曰崔杼生成及強而寡爾雅曰無夫無婦並謂之寡則  
知男子亦稱寡也

野客  
叢書

春秋壽者

先正言三代以上氣數醇醲聖賢皆壽以下反是然則周室東遷而入春秋壽者亦可數矣魯季孫行父季友子也僖十六年季友卒又六年行父用事始見於經文宣成皆十八年至襄五年行父卒去季友七十六年行父當近百歲鄭子產七穆之一子國子也襄八年鄭侵蔡始見於傳昭二十年卒行事可考者四十四年歷事簡定聲獻四公慮八九十歲齊晏平仲之父桓子襄十

七年卒平仲以知禮見於傳史記魯定公十年平仲卒  
言議可見者五十餘年亦當八九十歲吳季札吳主壽  
夢少子兄諸樊欲立季札讓國年可十五六哀十一年  
楚子期伐陳季札救陳退兵以爲子期名杜氏注襄十  
二年至今七十七年季札蓋九十餘史有謂札之年與  
春秋相終始者元人有言此四卿於春秋衰世諸人不  
得其壽之時獨能以壽永終者行父妾不帛馬不粟子  
產行已恭養民惠平仲納邑辭富一狐裘三十年季札

以國與人又能以名與人蓋薄取而厚與之德有以勝之乃天之所佑也其說有為而發求之古今不必盡合然此實常理有不可誣者嗟夫一日之短千載之長彭殤與旦暮何殊人有死而不朽者非老壽之謂君子亦強為善而已矣

餘冬序錄

絳縣老人

絳縣老人云臣生之歲正月甲子朔四百有四十五甲子矣其季於今三之一也季者末也今今日也謂已得



四百四十五全甲子其末一甲子六十日而今日乃癸  
未纔得二十日也故曰三之一文公之十一年至襄公  
三十年通七十四年以年表考之文公之十一年歲在  
己巳襄公之三十年歲在戊午今乃云七十三年者蓋  
謂襄公之三十年上距文公之十一年得七十三年也所  
謂亥二首六身者注云亥字二畫在上併三六為身如  
算之六蓋古之亥字如此二爻寫故曰二首六身其下  
六畫如算子三箇六數也所謂下二如身是其日數則

六千六百六旬也故曰是日數也且四百四十五甲子合得二萬六千七百日乃差四十日則前所謂其季於今三之一謂末甲子纔得二十日故少四十也且不謂之日而謂之旬者蓋古以甲子數日故謂之旬如今陰陽家所謂甲子旬中甲午旬中之類是也與書期三百有六旬同

西漢叢語

騷離

楚語伍舉曰德義不行則邇者騷離而遠者距遠伍舉

所謂騷離屈平所謂離騷皆楚言也楊雄為畔牢愁與

楚語注合

因學紀聞

廣莫

左傳狄之廣莫於晉為都杜預注廣音義與曠同廣莫猶言曠漠也風曰廣莫風門曰廣莫門音義皆如此

丹鉛

總錄

高祖

禮稱曾祖之父為高祖左傳昭公十七年鄭子來朝曰

我高祖少皞摯之立也則以始祖為高祖昭公十五年

王謂籍談曰昔而高祖孫伯鯨司晉之典籍則謂其九世祖

為高祖

因樹屋  
書影

為客

今之同席者皆謂之客非也古席面謂之客列座謂之  
旅主謂之獻客謂之酬故宋享晉楚之大夫趙孟為客  
注云客一座所尊也季氏飲大夫酒臧紇為客既獻臧  
孫命北面重席新樽潔之召悼子降逆之大夫皆起及

旅而名公鉏注云獻酬禮畢而通行為旅然則古者主先獻客客復酬之然後同席皆飲不如今之時不待獻酬而同席皆飲也

嬾真子

### 行李

唐李濟翁資暇錄云古使字作李左氏春秋傳言行李乃是行使後人誤為李字春秋僖公三十年左氏傳云若舍鄭以為東道主行李之往來供其困乏杜預曰李使人也又襄公八年左氏傳云亦不使一介行李告於

寡君杜預曰行李行人也又昭公十三年左氏傳曰諸侯靖共好以為事行理之命無月不至杜預曰行理使人通聘問者或言理或言李皆謂行使也但文其言謂之行李或作理耳以此知其非改古文為李也古文字多矣李濟翁不言李字出何書未可遽爾泛舉而改作也劉孝威結客少年場行云少年李六郡遨遊遍五都

李作使音

西溪叢語

弗加於山

楊州檢法寇中大庠河朔人也好以大言以屈座人一  
日於客次中間坐客云左傳山木如市弗加於山魚鹽  
蜃蛤弗加於海注云如在山海賈不加貴何也庠乃以  
此八字平分作兩句故座客卒然不能答庠意氣甚自  
得時僕為江都丞獨後至見諸人默然庠復舉前語問  
僕笑曰此乃一句何為分為兩句也庠笑曰果然謾不  
得蓋晏子之意以謂陳氏施私恩以收人心故低價以  
授與民是以山木魚鹽之類雖在齊國如在山海之中

不加貴也賈讀如價非商賈之賈

嬾真子

### 九頓首

九頓首出春秋傳然申包胥元是三頓首未嘗九也杜  
註無衣三章章三頓首每頓首必三此亡國之餘情至  
迫切而變其平日之禮者也七日夜哭於隣國之庭古  
人有此禮乎七日哭也九頓首也皆亡國之禮也不可  
通用也韓之戰秦獲晉侯晉大夫三拜稽首古但有再  
拜稽首無三拜也申包胥之九頓首晉大夫之三拜也



楚語湫舉遇蔡聲子降三拜納其乘馬亦亡人之禮也

錄  
日知

不說學

周之替也自原伯魯之不說學秦之亡也自子楚之不

習誦

困學  
紀聞

輕儒

齊人歌曰唯其儒書以為二國憂春秋之季已輕儒矣  
至戰國而淳于髡有賢者無益之譏秦昭王有儒無益

之問末流極於李斯

困學紀聞

恐人遷善

伯宗伐潞曰後之人或者將敬奉德義以事神人而申固其命若之何待之樂毅伐齊曰待彼悔前之非改過恤下而撫其民則難慮也羊祜伐吳曰若更立令主雖有百萬之衆長江未可窺也此皆兵家權謀惟恐人之遷善豈所謂以善養人者哉

困學紀聞

從政者新

楚伍參曰晉之從政者新謂荀林父也士彌牟曰晉之從政者新謂范鞅也一以喪師一以失諸侯書曰人惟

求舊

困學紀聞

一日十二時

古無以一日分為十二時之說洪範言歲月日不言時周禮馮相氏掌十有二歲十有二月十有二辰十日二十有八星之位不言時屈子自序其生年月日不及時呂才祿命書亦止言年月日不及時若一日之中所以

分紀其時者曰日中曰晝曰日昃見於易曰東方未  
明曰會朝曰日之方中曰昏曰夕曰宵見於詩曰昧爽  
曰朝曰日中昃見於書曰朝時曰日中曰夕時曰雞初  
鳴曰旦曰質明曰大昕曰晏朝曰昏曰日出曰日側曰  
見日曰逮日見於禮曰雞鳴曰日中曰晝曰日下昃曰  
日旰曰日入曰夜曰夜中見於春秋傳曰晷曰薄暮曰  
黃昏見於楚辭紀晝則用日史記項羽紀項王乃西從  
蕭晨擊漢軍而東至彭城日中大破漢軍呂后紀八月

庚申旦平陽侯密見相國產計事日舖時遂擊產彭越  
傳旦日日出十餘人後後者至日中淮南王安傳旦受  
詔日食時上漢書五行志日中時食從東北過半晡時  
復晡時食從西北日下晡時復武五子昌邑王傳夜漏  
未盡一刻以火發書其日中賀發晡時至定陶東方朔  
傳微行以夜漏下十刻乃出旦明入山下是也紀夜則  
用星詩之言三星在天三星在隅三星在戶春秋傳之  
言降婁中而且是也不辨星則分言其夜曰夜中曰夜

半曰夜鄉晨是也分言其夜而不詳於是有五分其夜而言甲乙丙丁戊者周禮司寤氏掌夜時注夜時謂夜晚早若今甲乙至戊漢書西域傳杜欽曰斥候士五分夜擊刁斗自守天文志本始元年四月壬戌甲夜地節元年正月戊午乙夜六月戊戌甲夜三國志曹爽傳自甲夜至五鼓爽乃投刀於地晉書趙王倫傳期四月三日丙夜一籌以鼓聲為應是也五分其夜而不詳於是言漏上幾刻者五行志晨漏未盡三刻有重月重見

又云漏上四刻半乃頗有光禮儀志夜漏未盡七刻鐘  
鳴受賀東方朔傳微行以夜漏上十刻迺出王尊傳漏  
上十四刻行臨到外戚傳晝漏上十刻而崩又云夜漏  
上五刻持兒與舜會東交掖門自南北史以上皆然故  
素問曰一日一夜五分之隋志曰晝有朝有禺有中有  
晡有夕夜有甲乙丙丁戊而無十二時之目也唯歷書  
云雞三號卒明撫十二時節卒於丑而下文却云朔旦  
冬至正北又云正北正西正南正東不直言子酉卯午

漢書五行志言日加辰巳又言時加未翼奉傳言日加申又言時加卯王莽傳天文郎按拭於前日時加某莽旋席隨斗柄而坐而吳越春秋亦云今日甲子時加於巳周髀經亦有加卯加酉之言若紀事之文無用此者左氏傳卜楚丘曰日之數十故有十時而杜元凱注則以為十二時雖不立十二支之目然其曰夜半者即今之所謂子也雞鳴者丑也平旦者寅也日出者卯也食時者辰也隅中者巳也日中者午也日昃者未也晡時



者申也日入者酉也黃昏者戌也人定者亥也一日分  
為十二始見於此考之史記天官書曰旦至食食至日  
昃日昃至餼餼至下餼下餼至日入素問藏氣法時論  
有曰夜半曰平旦曰日出曰日中曰日昃曰下餼吳越  
春秋有曰時加日出時加雞鳴時加日昃時加禺中則  
此十二名古有之矣史記孝景紀五月丙戌地動其早  
食時復動漢書武五子廣陵王胥傳奏酒至雞鳴時罷  
王莽傳以雞鳴為時後漢書隗囂傳至昏時遂潰圍齊

武王傳至食時賜陳漬耿弇傳人定時步果引去來歙  
傳臣夜人定後為何人所賊傷竇武傳自旦至食時兵  
降略盡皇甫嵩傳夜勒兵雞鳴馳赴其陳戰至晡時大  
破之晉書戴洋傳永昌元年四月庚辰禺中時有大風  
起自東南折木宋書符瑞志延康元年九月十日黃昏  
時月蝕熒惑過人定時熒惑出營室宿羽林皆用此十  
二時又淮南子曰出于暘谷浴于咸池拂于扶桑是謂  
晨明登于扶桑之上爰始將行是謂朏明至于曲阿是

謂朝明臨于曾泉是謂早食次于桑野是謂晏食臻於  
衡陽是謂禺中對於昆吾是謂正中靡於鳥次是謂小  
遷至於悲谷是謂晡時迴於女紀是謂大遷經於泉隅  
是謂高春頓於連石是謂下春爰止羲和爰息六螭是  
謂懸車薄於虞泉是謂黃昏渝于蒙谷是謂定昏按此  
自晨明至定昏為十五時而卜楚丘以為十時未知今  
之所謂十二時者自何人定之也

日知錄

經稗卷八

# 欽定四庫全書

經部  
經稗卷九

詳校官監察御史臣施朝幹

給事中臣溫常綬覆勘

總校官原任中允臣王燕緒

校對官庶吉士臣吳裕德

謄錄監生臣徐彩

欽定四庫全書

經解卷九

兗州府知府鄭方坤撰

三禮

冢宰宗伯領官

嬪御奄寺飲食酒漿衣服次舍器用貨賄皆領於冢宰  
冕弁車旗宗祝巫史卜筮瞽侑皆領於宗伯此周公相  
成王格心輔德之法周之興也滕侯為卜正呂伋為虎

賁氏侍御僕從罔靡正人左右携僕庶常吉士及其衰也昏稼靡共婦寺偕亂膳夫內史趣馬師氏締交於嬖寵瑣瑣姻亞私人之子竊位於王朝至秦而大臣不得議近臣矣至漢而中朝得以詘外朝矣至唐而北司是信南司無用矣由周公之典廢也間有詰責幸臣如申屠嘉奏劾常侍如楊秉宮中府中為一體如諸葛武侯可謂知宰相之職者唐太宗責房元齡以北門營繕何預君事豈善讀周禮者哉我朝趙普於一薰籠之造亦

制以有司之法李沆於後宮之立奏以臣沆不可趙鼎  
於內苑移竹責宦者罷其後庶幾古大臣之風矣五峯  
乃謂周公不當治成王燕私之事殆未之思也

困學紀聞

### 冢宰治內

周禮天官冢宰其屬有宮正實掌王宮之戒令糾禁內  
宰以陰禮教六宮以陰禮教九嬪蓋宮中官之長也故  
自后夫人之外九嬪世婦女御以下無不列於屬中後  
世宮掖之事非上宰可得而聞也禮記內則篇記男女



事父母舅姑細瑣畢載而首句云后王命冢宰降德於衆兆民則以其治內故也

容齋續筆

九嬪世婦女御

鄭康成謂羣妃御見之法女御八十一人當九夕世婦二十七人當三夕九嬪九人當一夕三夫人當一夕后當一夕凡十五日而徧汪子曰悖哉鄭氏之說也周公定周禮在成王之世其昏禮亦當作於是時成王春秋方富周公雖導之以德閑之以義猶懼其有乘間投隙

以荒淫之術進者而況多其女寵定為不刊之制以誘之乎夫每一夕之中所御者九人自非淫欲不道之君若齊之武成隋之煬帝必不禁色如此也故使一夕御之而徧則人主之身亦異於金石矣積之既久得母有如醫和所謂蠱疾者耶苟其不能徧則是一百二十人者雖時時抱衾裯以往返其側猶不免有怨女之嘆而顧使之十五日之間僅得奉斯須之顏色哉且大臣之愛其君也非如左右近習以諧媚為容者也霍子孟為

政命宮人皆為窮袴多其帶以防閑昭帝可謂嚴且密矣而昭帝猶至於天豈有周公之聖而定為一夕九人之制如此凡所以輔導成王者曾不若子孟吾不信也故吾謂九嬪世婦女御既與女酒女漿女邊女醢女醢女鹽女霽女祝史之徒俱統於冢宰是皆宮中之職左右后妃以供事者決非進御於王者也或亦擇卿大夫之妻之寡者與其老而無子者任之故謂之內命婦與九嬪條曰掌婦學之法以教九御各率其屬而以時御

叙于王所吾謂周禮所言御者又決非相從於燕寢者  
也不然九嬪以下共一百二十人而又莫不有屬其為  
數常不啻數百矣王亦安能一一御之如鄭氏所說耶  
漢儒好為新奇之說而多出於不根殆不足信

堯本  
文鈔

### 酒奚

今以妓為官奴即官婢也周禮天官酒人奚三百人注

今之侍史官婢

輟耕  
錄

### 醫師

古之時庸醫殺人今之時庸醫不殺人亦不活人使其人在不死不活之間其病日深而卒至於死夫藥有君臣人有強弱有君臣則用有多少有強弱則劑有半倍多則專專則效速倍則厚厚則其力深今之用藥者大抵雜泛而均停既見之不明而又治之不勇病所以不能愈也而世但以不殺人為賢豈知古之上醫不能無失周禮醫師歲終稽其醫事以制其食十全為上十失一次之十失二次之十失三次之十失四為下是十失

三四古人猶用之而淳于意之對孝文尚謂時時失之  
臣意不能全也易曰裕父之蠱往見吝奈何獨取夫裕  
蠱者以為其人雖死而不出於我之為嗚呼此張禹之  
所以亡漢李林甫之所以亡唐也

日知錄

### 九藏

古之醫者言九藏今之醫者言五藏注家以胃旁胱大  
小腸與心脾肝肺腎為九藏然旁胱則小腸也當是心  
脾肝肺胃腎膽大小腸為九藏則於脉法可通疏家謂

膽三焦非正府不在九藏之數附會注說今醫家固云  
三焦無藏空有名又云男以藏精女以繫胞則三焦即  
腎之右脉也旁胱附於小腸而以膽居九藏之列為得  
其當經云參之以九藏之動即三部九候之法案脉者  
左心小腸肝膽右肺大腸脾胃而腎居兩脉尺脉八藏  
各二藏同一位惟腎以一藏居一位腎有左右二脉龜  
蛇二體在焉宜改正注疏之說則九藏之法於儒書醫

典皆通

熊氏  
經說

# 瘡疾

周官疾醫四時皆有癘疾春時有瘡首疾鄭注瘡酸削也司馬相如消渴則所謂消中之疾也瘡首消中二疾既異而其字亦自不同後人往往不辨指為一疾鮮有別之者後漢李通素有消疾此正如相如渴疾也太子賢注消中之疾是已乃復引周官為証是以消中瘡首為一義以至玉篇廣韻之類皆以瘡為消病惟禮部韻瘡字下注酸瘡頭痛是為得之張孟押韻注酸瘡頭痛



又渴病雖明知二疾為不同是認二字為一體矣

野客叢書

獸醫

世以療馬者曰馬醫療牛者曰牛醫周禮天官冢宰篇  
獸醫下士八人注獸牛馬之屬按此則療牛者亦當曰

獸醫矣

輟耕錄

致日致月

馮相氏冬夏致日春秋致月疏以為日實也故於陰陽  
極之時致之月有盈虧故於陰陽中之時致之此附會

為之說耳於歷義無當也蓋歷法之要惟定二至二分  
為先二至定則歷元正矣必也立表測晷檢驗長短之  
極如祖沖之及今歷之密焉此冬夏致日之說也月行  
有贏縮歷自秋分至春分之前縮自春分至秋分之前  
贏若但以百八十二日中分之以求赤道之交則晷景  
不得矣此亦可以立表參求而今歷更得一術用日月  
東西對望檢之使得二分之正蓋冬行南陸則地上之  
天少而地下之天多夏行北陸則地上之天多而地下

之天少其日月之東西相對者非望也惟春分秋分行於中道則日月對衡於地平即真望矣以其真望之在何時檢二分之所在此春秋致月之說也冬夏致日者於南北春秋致月者於東西亦各以其方位為此說者以為獨得之秘而不知古之聖人知此久矣

周官  
筆記

### 凶禮

大宗伯以凶禮哀邦國之憂其別有五曰死亡凶札禍災圍敗寇亂是古之所謂吉禮者不但於死亡而五服

之外有非喪之喪者緣是而起也記曰年不順成天子  
素服乘素車食無樂又曰年不順成君衣布搢本周書  
曰大荒王麻衣以朝朝中無綵衣此凶札之服也司服  
大札大荒大災素服注曰大災水火為害君臣素服縞  
冠若晉伯宗哭梁山之崩春秋新宮災三日哭此禍災  
之服也記曰國亡大縣邑公卿大夫士厭冠哭于太廟  
又曰軍有憂則素服哭于庫門之外大司馬若師不功  
則厭而奉主車春秋傳秦穆公敗于殽素服郊次鄉師

而哭此圍敗之服也若夫曲禮言大夫士去國素衣素  
裳素冠徹緣鞵履素襪乘髦馬孟子言三月無君則弔  
而季孫之會荀躒練冠麻衣此君臣之不幸而哀之者  
矣秦穆姬之逆晉侯免服衰經衛侯之念子鮮稅服終  
身此兄弟之不衰而哀之者矣楚滅江而秦伯降服出  
次越圍吳而趙孟降于喪食此與國之不幸而哀之者  
矣先王制服之方固非一端而已記有之曰無服之喪

以畜萬邦

日知錄

保章氏

鄭司農云保章氏五雲之物二至二分觀雲色青蟲白  
喪赤兵荒黑水黃豐東方朔別傳云凡占東畔當視天  
有黃雲來如覆車五穀大熟青致兵白致盜烏黑多水

赤火

續博物志

正月之吉

大司徒正月之吉始和布教于邦國都鄙注云周正月  
朔日正歲令于教官注云夏正月朔日即此是古人三

正並用之驗逸周書周月解曰亦越我周解正以垂三  
統至於敬授民時巡狩烝享猶自夏焉正謂此也豳詩  
七月一篇之中凡言月者皆夏正凡言日者皆周正一  
之日歲發二之日栗烈三之日于耜傳曰一之日周正  
月二之日殷正月三之日夏正月

日知錄

### 五溝五涂

禹盡力乎溝洫濬畎澮距川遂人五溝五涂之制因於  
古也以水佐耕者豐稻人掌之以水佐守者固司險掌

之自鄉遂之法弛子駟為田洫而喪田者以為怨子產  
作封洫而伍田疇以為謗晉欲使齊盡東其畝而我車  
是利甚而兩周爭東西之流至商鞅決裂阡陌呂政決  
通川防古制蕩然矣古者內為田廬外為溝洫在易之  
師寓兵於農伏險於順取下坎上坤之象溝洫之成自  
禹至周非一人之力溝洫之成自周衰至秦非一日之  
積先儒謂井田壞而我馬入中國如入無人之境悲夫

困學  
紀聞



合耦

人耦牛耦鄭氏注合耦並言之疏謂周時未有牛耦耕至漢趙過始教民牛耕今考山海經后稷之孫叔均始作牛耕周益公云孔子有犁牛之言冉耕亦字伯牛賈誼書新序載鄒穆公曰百姓飽牛而耕月令季冬出土牛示農畊早晚何待趙過過特教人耦犁費省而功倍

爾困學紀聞

耜

里宰以歲時合耦於耜注云耜者里宰治處也若今街  
彈之室于此合耦使相佐助疏謂漢時在街置室檢彈  
一里之民金石錄有中平二年正月都鄉正街彈碑在  
昆陽城中趙明誠失于考禮注而酈氏注水經洪氏隸  
釋皆以街為衛又誤矣漢食貨志言古制云春將出民  
里胥平旦坐于右塾鄰長坐于左塾畢出然後歸夕亦  
如之里胥之塾其即里宰所謂耜者歟

困學紀聞

不入兆域

家人凡死于兵者不入兆域注戰敗無勇投諸塋外以  
罰之左氏趙簡子所謂桐棺三寸不設屬辟素車樸馬  
無入於兆而檀弓死而不弔者三其一曰畏亦此類也  
若敝無存死而齊侯三褫之與之犀軒與直蓋而親推  
之三童汪錡死而仲尼曰能執干戈以衛社稷可無殤  
也豈得以此一槩隋文帝仁壽元年詔曰投生殉節自  
古稱難隕身王事禮加二等而世俗之徒不達大義致  
命戎旅不入兆域虧孝子之意傷人臣之心興言念此

每深慙嘆且入廟祭祀並不廢闕何至墳塋獨在其外  
自今以後戰亡之徒宜入墓域可謂達古人之意又攷  
晉趙文子與叔譽觀乎九原而有陽處父之葬則得罪  
而見殺者亦未嘗不入兆域也

日知錄

### 前朝後市

神宗嘗問經筵官周官前朝後市何義黃右丞履時為  
侍講以王氏新說對言朝陽事故在前市陰事故在後  
上曰亦不獨此朝君子所集市小人所居向君子背小

人之意諸臣聞之悚然

石林燕語

迹人

迹人春秋末宋猶有是官左氏哀十四年傳迹人來告

曰逢澤有介麋焉

困學紀聞

土圭地中

土圭條所謂地中及東西南北之偏就九州以內言之耳如今南方多熱北方多寒近海處多風近山處多陰故惟中州氣候為得其正而其日景則夏至之日適與

土圭齊故取以為準是日景以中土而定非土中因日  
景而得也經云正日景以求地中所謂求者猶標識之  
義耳解者穿鑿附會要歸於臆說不可行也景短多暑  
言景短時多暑也景長多寒言景長時多寒也景夕多  
風言景夕時多風也景朝多陰言景朝時多陰也景短  
謂夏景長謂冬景夕謂午後景朝謂午前又按自古天  
地道里日月晷景之說多矣至於今日西厯之家其說  
彌詳蓋以為地在中只一彈丸四方上下去天之數

皆均其四表極處非能與天相際也所謂天圓地方者  
言其動靜之性耳實則地亦圓體如卵裹黃上下周圍  
與天度相應其地氣寒暑則以去日遠近為差赤道之  
下正與日對其地最熱其景則四時常均無冬夏短永  
兩極之下去日最遠其地最寒其景則短者極短長者  
極長正當兩極之處以半年為晝半年為夜惟二極與  
赤道相去之間當日南北軌之外起二十三度至四十  
度許其地不寒不熱溫和可居其景則與冬夏進退長

短之極皆無過十之七此氣之平而數之中也環地上  
下皆有國土人居各以戴天為上履地為下南北東西  
隨處改觀午夜晨昏每每相反蓋皆負氣而生麗陽而  
明周游環匝初無定位其名有亞細亞歐羅巴利未亞  
亞墨利加四大洲今之九州及四夷之地皆亞細亞國  
土也其所記親歷各州風土山川寥廓荒忽雖不可盡  
信然其實測晷景見諸施行者頗為信而有徵其理蓋  
不可誣今以其說考之則中國九州正當黃道北軌距



赤道二十四度之外起於廣州夏至戴日之下迤邐而北至于夏至去日十六度許則今直隸也自此復塞而北風氣漸寒晝夜短永漸踰其度自廣州趙海而南則氣漸酷熱而晝夜之刻漸無短永矣故惟九州之內風氣和時刻平而洛又其中之中也是以天地四時之所交合陰陽風雨之所和會昔之達者其知之矣而周公豈欺我哉或曰此以言南北暑寒則可矣東西風陰之理亦可得聞歟曰由前之說則環處於地者迭為東

西未可以先儒日出日入午前午後之說拘之也蓋九州之域西則多山而東際海近山則多陰濱海則多風驗之閩蜀之地可見然則周禮之風陰亦就九州言之明洛邑之為中耳其所以風所以陰恐山水之為而非日出入朝暮之故也

周官  
筆記

### 六藝

七月流火天文也相其陰陽地理也四矢反兮射也兩驂如舞御也止戈為武皿蟲為蠱書也千乘三去亥有

二首六身數也古之時人人知之而今日遂為絕學且  
曰藝而已矣不知之無害也此近代之儒所以自文其  
空疎也

日知錄

因國

有勝國有因國周禮媒氏凡男女之陰訟聽之於勝國  
之社喪祝掌勝國邑之社稷之祝號士師若祭勝國之  
社稷則為之尸書序言湯既勝夏欲遷其社又言武王  
勝殷左傳凡勝國曰滅之是也王制天子諸侯祭因國

之在其地而無主後者左傳子產對叔向曰遷關伯於  
商丘主辰商人是因遷實沈於大夏主參唐人是因齊  
晏子對景公曰昔爽鳩氏始居此地季荊因之有逢伯  
陵因之蒲姑氏因之而後太公因之是也

日知錄

### 太史日官

周禮春官之屬曰太史掌建邦之六典以逆邦國之治  
正歲年以序事頒之于官府及都鄙頒告朔于邦國小  
史掌邦國之志莫繫世辨昭穆鄭氏注云太史日官也

引左傳天子有日官諸侯有日御為說志謂記也史官  
主書國語所謂鄭書及帝繫世本之屬是也小史主定  
之然則周之史官日官同一職耳故司馬談為漢太史  
令而子長以為文史星歷近乎卜祝之間固主上所戲  
弄倡優畜之流俗之所輕也今太史局正星歷卜祝輩  
所聚其長曰太史局令而隸秘書省有太史案主之蓋  
其源流有自來矣

容齋  
續筆

三兆

古之卜者皆有繇辭周禮三兆其頌皆千有二百如鳳  
凰于飛和鳴鏘鏘間于兩社為公室輔專之渝攘公之  
踰一薰一蕕十年尚猶有臭如魚鼈尾衡流而方羊裔  
焉大國滅之將亡闔門塞竇乃自後踰大橫庚子為  
天王夏啓以光之類是也今此書亡矣漢人尚視其體  
今人雖視其體而專以五行為主三代舊術莫有傳者

涉溪  
筆談

占夢

漢藝文志七畧雜占十八家以黃帝長柳占夢十一卷  
甘德長柳占夢二十卷為首其說曰雜占者紀百家之  
象候喜怒之證衆占非一而夢為大故周有其官周禮  
太卜掌三夢之法一曰致夢二曰觭夢三曰咸陟鄭氏  
以為致夢夏后氏所作觭夢商人所作咸陟者言夢之  
皆得周人作焉而占夢專為一官以日月星辰占六夢  
之吉凶其別曰正曰噩曰思曰寤曰喜曰懼季冬聘王  
夢獻吉夢於王王拜而受之乃舍萌於四方以贈惡夢

舍萌者猶釋采也贈者送之也詩書禮經所載高宗夢  
得說周文王夢帝與九齡武王伐紂夢叶朕卜宣王考  
牧牧人有維魚維旗之夢召彼故老訊之占夢左傳所  
書尤多孔子夢坐奠於兩楹然則古之聖賢未嘗不以  
夢為大是以見於七畧者如此魏晉方技猶時時或有  
之今人不復留意此卜雖市井妄術所在如林亦無一  
箇以占夢自名者其學殆絕矣

容齋  
續筆

### 穀璧



周禮典瑞子執穀璧男執蒲璧皆五寸三禮圖穀璧畫  
禾莖之狀蒲璧圖蘆葦之形此亦以意度妄作如犧樽  
象罇之誤蓋穀璧圓瑑拱起狀如粟粒蒲璧畝畫細文  
形似蒲華即今二璧多有存者世儒莫辨焦氏筆乘

子男不執璧

從來言圭有五等以周禮大宗伯公執桓圭侯執信圭  
伯執躬圭子執穀璧男執蒲璧為據而其實不然按曲  
禮凡摯諸侯圭是子男同執圭也雜記贊大行曰圭公

九寸侯伯七寸子男五寸是子男不執璧也獨此言子男執璧耳夫曲禮言摯自天子達庶人且詳及婦人童子野外軍中何獨畧于子男雜記則更詳其長短之度蓋列爵雖五而車旗服物之等維三大率隆殺以兩則九寸七寸五寸之文必有所據奈何是此非彼乎覲禮天子當依南面立諸侯入廟門右坐奠圭玉再拜言諸侯則子男在其中言奠圭玉而不及璧則子男執圭可知禮器云禮有以少為貴者圭璋特謂朝聘用圭璋圭

璋皆特達享禮用璧琮則以束帛薦之若子男執璧則璧亦有特時矣何以不言乎顧命云上宗奉同瑁玉人云天子執瑁以朝諸侯說者謂瑁方四寸邪刻之以冒諸侯之圭璧夫圭方璧圓瑁可冒圭而不可冒璧且未聞天子有兩冒也亦必無置子男而不冒也則五等皆圭益信矣況圭以為摯手所執也當朝覲行禮時使子男執璧若奉槃然尚何禮度足言乎又按諸侯始封天子錫之介圭傳諸子孫是曰命圭朝聘用以為信禮畢

反之覲禮聘禮班班可考璧非天子所命庭實用之祭祀贈遺燕好用之傳記昭然不得與圭混也

辨志堂文集

### 稽首

古人以稽首為敬之至周禮太祝辨九拜一曰稽首註稽首拜中最重臣拜君之禮禮記郊特牲大夫之臣不稽首非尊家臣以避君也左傳僖公二十三年秦伯享晉公子重耳公賦六月公子降拜稽首公降一級而辭焉襄公三年盟于長檮公稽首知武子曰天子在而君

辱稽首寡君懼矣二十四年鄭伯如晉鄭伯稽首宣子  
辭子西相曰以陳國之介恃大國而陵虐於敝邑寡君  
是以請罪焉敢不稽首哀公十七年盟於蒙齊侯稽首  
公拜齊人怒孟武伯曰非天子寡君無所稽首國語襄  
王使召公過及內史過賜晉惠公命晉侯執玉卑拜不  
稽首內史過歸以告王曰執玉卑替其贄也拜不稽首  
誣其上也替贄無鎮誣王無民可以見稽首之為重也  
自敵者皆從頻首李陵報蘇武書稱頻首陳氏禮書曰

稽首者諸侯于天子大夫士于其君之禮也然君子臣  
亦有稽首書稱太甲稽首於伊尹成王稽首于周公是  
也大夫于非其君亦有稽首儀禮公勞賓賓再拜稽首  
勞介介再拜稽首是也蓋君子行禮于其所敬者無所  
不用其至則君稽首于其臣者尊德也大夫士稽首于  
非其君者尊主人也春秋之時晉穆嬴抱太子頻首于  
趙宣子魯季平子頻首于叔孫則頻首非施于尊者之

禮也

日知錄

牛耳

孫君孚談圃謂周官贊牛耳荆公言取其順聽不知牛有耳而無竅本以鼻聽有人引一耳與荆公辯今按周禮義云牛耳尸盟者所執無順聽之說蓋荆公聞而知之困學紀聞

九棘

禮秋官孤卿位九棘王制司寇聽之棘木之下易繫用徽纆寘之叢棘後漢書寇榮傳寘之嚴棘之下本所以

斷獄治寇也春秋元命苞曰樹棘槐聽訟于其下棘赤  
心有刺治人者原其心不失其赤實事所以刺人情令  
各歸實也即今小棗叢生者以並束低小也故曰叢棘  
九者陽數之極九卿之象也又唐刺史李國清為其下  
所逐掠府庫李忠臣即圍棘約士投所掠物圍中一日  
盡獲今則上自官府取之而自圍下至試院取之而圍  
士是蓋以防賊者而防官防士矣安得使其官其士不

為民賊乎

留青  
日札



攷工文

嘉量之銘祭侯之辭皆極文章之妙而梓人筭虞之制  
文法奇古有飛動之狀蓋精於道者兼物物而後能制  
器莊子謂梓慶削木為鐻鐻成見者驚猶鬼神以天合  
天道與藝俱化豈物物刻雕之哉

困學紀聞

函人為甲

周禮函人為甲犀甲七屬兕甲六屬合甲五屬注屬讀  
如灌注之注謂上旅下旅札續之數也甲堅者札長鄭

司農云合甲削甲裏肉但取其表合以為甲而管子亦稱定三革偃五兵三革疑即此三甲注以為車馬人皆有甲曰三革未詳孰是大抵三甲之堅犀不如兕兕不如合合甲蓋只瑩牛皮為之故止於五屬牛家畜也皮可時得而一角之兕三角之犀產于窮山來自荒徼豈能給三軍之用易但云鞞用黃牛之革莫之勝說言牛革堅也宋程大昌亦引春秋華元牛則有皮犀兕尚多言是牛皆有皮可甲而自牛以外犀兕亦不乏雖例為

夸言亦可以見犀兕之少于牛以今推之豈惟少于牛  
殆絕無矣觀戰國吳起見魏文侯曰今君四時使斬離皮  
革掩以朱漆畫以丹青爍以犀象意古者獸蹄鳥跡交  
于中國尚有以犀象為甲自周公驅遠唐叔射殪爾後  
中國不可多得故但得漆牛之皮以為甲而以丹青繪  
兩獸之形於其上徒以壯軍容而作士勇亦謂之犀甲  
兕甲非實有兩獸之皮以為甲也程大昌又引晉書載  
馬隆之討涼州夾道累磁石賊負鐵鎧行不得前而隆

卒悉披犀甲無所留礙賊以為神王隱晉書載隆兵悉著牛皮鎧得過則是實用牛皮而名以為犀余謂牛之有皮以為甲則謂之犀蓋亦自古以然古人凡堅謂之犀雖器物之堅利通謂之犀如車曰犀車舟曰犀舟鉞亦曰犀鉞豈徒甲哉惟後世用鐵為甲雖朱子以為不知起於何時仲長統昌言曰古者以車戰而甲無鐵札之制今誠以革甲當強弩亦必喪師亡國也然則甲之用皮本由車戰自春秋之戰已有毀車為行則鐵甲之制

亦將漸興於此時孔子曰衽金革金鐵甲也革皮甲也

互用之矣

金匱子

考極星

大司徒建邦國以土圭土其地匠人建國畫參諸日中之景夜考之極星詩定之方中傳云度日出日入以知東西南視定北準極以正南北愚按晏子春秋景公新成柏寢之室使師開鼓琴師開左撫宮右彈商曰室夕東方之聲薄西方之聲揚公召大匠曰室何為夕大匠

曰立室以宮矩為之于是召司空司審曰立宮以城矩為之  
明日晏子朝公曰先君太公立城何為夕對曰古之立  
國南望南斗北戴樞星彼安有朝夕哉而以今之夕者  
周之建國國之西方以尊周也公曰古之臣乎樞星即  
極星也公劉居豳既景迺罔然則尚矣

國學  
紀聞

### 葺屋瓦屋

考工匠人葺屋三分瓦屋四分葺茅屋也茅屋欲峻而  
走水從簷至棟二分加一分為峻瓦屋差平從簷至棟

四分加一分為峻三分者假如簷柱一丈即棟柱一丈五尺也四分者假如簷柱一丈即棟柱一丈二尺五寸

也

熊氏經說

### 魯削

古未有筆以書刀刻字于方策謂之削魯為詩書之國

故考工記以魯之削為良

困學紀聞

### 金錫

考工記攻金之工皆曰金錫金即銅錫即銀也故曰金

幾分錫居幾以為斧斤戟刃之屬東氏為量煎金錫聲  
中黃鐘之宮假如以今之錫豈可摻和作斧斤戟刃而  
量能聲中宮乎況今之錫與銅亦不可摻和以冶也史  
平準書漢食貨志皆稱銀錫漢武造銀錫為白金其稱  
猶為近古也越絕書赤堇之山破而出錫若邪之谷涸  
而出銅歐冶用以為純鉤之劍尤可證鑄兵用銅蓋必  
兼以銀乃淬利也

潛丘  
割記

鼓人



周禮鼓人以雷鼓鼓神祀靈鼓鼓社祭路鼓鼓鬼享鼗鼓鼓軍事鼗鼓鼓役事晉鼓鼓金奏鄭氏注云雷鼓八面鼓也靈鼓六面鼓也路鼓四面鼓也鼗鼓兩面鼓也鼗鼓晉鼓不言幾面則一面無疑矣故樂府用其說乃作一鼓而八出或六出四出不惟不能考擊所謂兩面者但以兩頭有革者便為兩面則鼗晉與鼗無別矣陳祥道禮書釋云八面六面四面言由八枚六枚四枚按周禮鞀人為皋陶鼓長八尺鼓四尺中圍加三之一謂

之鼗鼓為皋鼓長尋有四尺鼓四尺倨句磬折鄭司農  
云鼓四尺謂面四尺司農去周不遠其言當有所據不  
應前後自異則八面六面四面兩面從可知矣皋有磬  
折之勢而禮家反不以此為據何耶

雲麓  
漫抄

### 臚

婦人頭髮有時為膏澤所黏必沐乃解者謂之臚按攷  
工記弓人注云臚亦黏也音職則髮臚之臚正當用此

字

鞞耕  
錄

量銘

考工記臬氏掌攻金其量銘曰時文思索故今世攻作之所號文思院

青箱雜記

禽獸可互名

益稷百獸率舞非專以走獸為言考工記曰天下大獸五脂者膏者羸者羽者鱗者是禽亦可以名獸後漢書華陀語吳普曰吾有一術名五禽之戲一曰虎二曰鹿三曰熊四曰猿五曰鳥是獸亦可以名禽

焦氏筆乘

周禮饒字

宋景文公曰夢得嘗作九日詩欲用饒字思六經中無此字遂止故景文九日詩曰劉郎不肯題饒字虛負人生一世豪僕讀周禮疏羞籩之實糗餌粉餐鄭註今之饒饒安謂六經中無此字邪又觀揚雄方言亦有此字茗溪漁隱謂古人九日詩未有用饒字惟崔德符和呂居仁一詩有買饒沽酒之語僕謂景文詩劉郎不肯題饒字虛負人生一世豪茲豈古人詩未用饒耶

野客叢書

周禮飴字

唐人欲作寒食詩欲押飴字以無出處遂不用殊不知出於六經及楚辭也周禮小師掌教簫注云簫編小竹管如今賣飴者所吹也管如篴併而吹之招魂曰粍粍密餅有餠餠些注云餠餠飴也但戰國時謂之餠餠至後漢時乃謂之飴耳

續真子

儀禮傳

子夏子游以文學稱其為文簡練琢磨調法俱備子夏

儀禮傳高似公穀有力量公穀皆其門人子游文雖不可考以子夏度之亦可想見又檀弓篇中多有推尊子游處以為子游之徒理或然也檀弓文有姿致子夏比之又覺簡質而勁此便是南北文字分派之始

稽村語錄

### 日入三商

士昏禮目錄日入三商為昏疏云商謂商量是漏刻之名故三光靈曜亦日入三刻為昏不盡為明案馬氏云日未出日沒後皆二刻半前後共五刻今云三商者據

整數而言其實二刻半也詩正義云尚書緯謂刻為商  
夏文莊蓮華漏銘五夜持宵三商定夕蓋取此蘇子美  
亦云三商而眠高春而起

困學紀聞

士昏禮漏下三商為昏商音滴與夏商之商不同蘇易  
簡文三商而眠高春而起用其語也今人多誤讀

焦氏筆乘

詩禮相為表裏

詩禮相為表裏賓之初筵行葦可以見大射儀楚茨可

以見少牢饋食禮

困學紀聞

肅揖拜

肅是肅揖是揖拜是拜肅不是揖揖不是拜且肅與揖俱不是肅揖肅與拜俱不是肅拜其肅不是揖何也禮註直身而推其手曰肅推者拱也謂上其手也肅者直也詩傳九月肅霜註肅與縮同即直也是肅者直其身也其手與揖之曲其身而下其手正自相反蓋揖與擡同擡有俯義即禮所云磬折者折者曲也俯也故禮註曲躬而引其手即謂之揖蓋引為下手與推之上手不



同擡之折躬與縮之直躬又不同是以周禮司儀詔王儀凡有三揖以深淺為別一曰土揖見庶姓則引手着地深揖也一曰時揖見異姓則引手與常揖等時者常也平揖也一曰天揖見同姓則畧引其手高而不下如在天然淺揖也淺揖與肅近而終以引而不推小俯而不直即不稱為肅而稱為揖其嚴如此是以三揖之外別有所謂肅揖者既不是肅又不是揖以為肅耶則引而不推以為揖耶則直而不曲于是合名為肅揖又名

長揖介者與婦人恒用之西征賦率軍禮以長擗擗即揖也長者不曲以介士不可曲也其揖不是拜何也揖第曲身而拜必曲膝說文曰拜跪拜也又曰拜者首至地也故周禮九拜無立儀而晉宋儀註賤人揖貴人拜拜揖異等故東觀漢記陳遵使匈奴送者曰子當之絕域無以相勉勉子以不拜遂揖而別拜揖之不同如此况肅拜非拜并非肅揖周禮九拜儀九曰肅拜皆跪拜之節故肅揖為長揖肅拜為長跪樂府伸腰再拜跪謂

直身屈膝而再引其手與肅揖之不曲膝而直身引手  
大別陳澍集說乃謂俯揖即肅拜則是拜揖尚未明何

言肅也

毛西河  
文集

娣姒

余觀儀禮娣姒婦之文娣在姒上而傳又釋之曰弟長  
也分明娣長而姒幼乃鄭康成注始將娣姒倒置而賈  
氏之疏因之若是將傳文所謂弟長也之語作何解乎  
及考左氏傳穆姜宣公妻也聲伯之母宣公弟叔肸之

妻也而穆姜稱聲伯之母為姒子容之母叔向之嫂也  
伯石之母叔向之妻也而子容之母稱伯石之母為姒  
則是娣為兄妻姒為弟妻與儀禮及傳文正合無可疑  
矣而乃顛倒其說謂姒長而娣穉可乎獨怪賈公彥明  
知左氏穉婦為姒之說乃過護鄭註謂年小為娣年大  
為姒穆姜所言是據年大小為娣姒而不據夫年為大  
小夫婦人以夫之齒為齒而不以己之齒為齒此禮至  
今不變也豈有不據夫之年而但據己之長者乎且又

安知穆姜之年必少於聲伯之母乎至孔穎達釋檀弓亦同其說縱使諸子之言盡是究於傳文弟長之說合乎否乎惟王子雍氏與教繼公氏其說得之而惜其語焉不詳猶未能大暢厥旨也余故申明其說以與考古

者質焉

讀書  
通攷

案傳文弟長者雙訓娣姒言娣是弟姒是長非以娣為長也萬氏之引左氏傳似矣但鄭康成以稱婦為娣長婦為姒蓋本爾雅釋親篇爾雅一云女子同出謂先生

為妯後生為娣郭璞注同出謂俱嫁事一夫公羊傳曰  
諸侯娶一國二國往媵之以姪娣從娣者弟也即其義  
也此解一夫之所娶者與妯娌不同一云長婦謂稱婦  
為娣婦娣婦謂長婦為妯娌注今相呼先後或云妯娌  
足知兄妻為妯弟妻為娣甚明矣而儀禮賈公彥疏爾  
雅邢昺疏皆引左傳穆姜謂聲伯母為妯叔向之嫂謂  
叔向之妻為妯二事遂言娣妯之稱止言婦之長稱不  
計夫之大小亦已鑿矣邢昺疏引喪服小功章知其以

弟長解娣姒者娣是弟姒是長又引公羊傳云娣是何弟也知其以弟解娣自然以長解姒大義已得其半而不熟玩儀禮爾雅本文徒以婦年之長幼為論是亦何有關係况曷疏亦云賈逵鄭玄及杜預皆云兄弟之妻相謂為姒穆姜叔向之嫂所稱亦閨閭相習互以長者互稱耳又奚疑焉余與萬氏討論最詳而不能盡同者此類是也

徐健庵集

六牲

古之為禮以祭祀燕享故六牲之掌特重執豕于牢稱  
公劉也爾牲則具美宣王也至于鄰國相通則葛伯不  
祀湯使遺之牛羊而衛戴公之廬于曹齊桓歸之牛羊  
豕雞狗皆三百其平日國君無故不殺牛大夫無故不  
殺羊士無故不殺犬豕而用大牲則卜之于神以求其  
吉故左氏載齊國之制公膳止于雙雞而詩人言賓客  
之設不過兔首魚鱉之類古人之重六牲也如此自齊  
靈公伐萊萊人使正輿子賂之索馬牛皆百匹而吳人



徵魯百牢始于貪求終于暴殄于是范蠡用其霸越之餘謀以畜五特而澤中千足甌得比封君孳畜之權不在國而在民矣

日知錄

行役以婦人

禮疏六十閉房者素問云人生五八而腎氣衰髮墮齒槁六八陽氣衰竭面焦鬚髮白七八肝氣衰筋不能動天癸竭精少腎藏衰形體皆瘠八八則齒髮去身體重五藏皆衰筋骨解墮天癸盡矣故于此須閉房也魯男

子曰男女不六十不間居謂可無嫌也七十閉房者七十則益老益衰矣惟資人養而婦人能養人故行役以婦人非復有房中之事也夫婦之禮惟年七十同藏無間亦此意也

金壘子

### 負劍辟咡

曲禮記童子事曰負劍辟咡詔之鄭玄注云負謂置之於背劍謂挾之於旁辟咡詔之謂傾頭與語口旁曰咡歐陽公作其父隴岡阡表云回顧乳者劒汝而立予旁

正用此義今廬陵石刻猶存衢州所刊六一集已得其真或者不曉遂易劒為抱可歎也

容齋隨筆

君子欠伸章

君子欠伸一章余在經筵進講謂君以自强不息為剛臣以陳善閉邪為敬講經理討古今有夜分日昃而不倦者上無厭斁之心下無願望之意是故學以聚之而德益進問以辨之而理益明蓋因以規諷云

困學紀聞

女子子

女子子謂已所生之子若兄弟之子言女子者別于男子也古人謂其女亦曰子詩曰齊侯之子衛侯之妻論語曰以其子妻之是也此章言男女之別故加女子于子之上以明之下乃專言兄弟者兄弟至親兄弟之于姊妹猶弗與同席同器而況于姑乎況于女子子乎不言從子不言父據兄弟可知也喪服小記言女子子在室為父母杖然則女子子為已所生之子明矣

日知錄

取妻不取同姓

姓之為言生也詩曰振振公姓天地之化專則不化兩則生故叔詹言男女同姓其生不蕃而子產之告叔向云內官不及同姓美先盡矣則相生疾晉司空季子之告公子曰異德合姓鄭史伯對桓公曰先王聘后于異姓務和同也聲一無聽物一無文是知禮不取同姓者非但妨嫌亦以戒獨也故曲禮納女于天子曰備百姓而郊特牲注云百官公卿以下也百姓王之親也易曰男女睽而其志通也是以王御不叅一族其所以合陰

陽之化而助嗣續之功者微矣

日知錄

### 車騎

古以車戰春秋時鄭晉有徒兵而騎兵蓋始于戰國之初曲禮前有車騎六韜言騎戰其書當出于周末然左氏傳左師展將以昭公乘馬而歸公羊傳齊魯相遇以鞍為几已有騎之漸

因學紀聞

### 臨文不諱

日知錄云堯舜禹皆名也古未有號故帝王皆以名紀

臨文不諱按曲禮詩書不諱臨文不諱盧植註曰臨文  
謂禮文也禮執文行事故言文也鄭康成注曰為其失  
事正也陳皓注曰不因避諱而改行事之語蓋恐有誤  
於承用也從來解文字皆如此而從來引此句多誤豈  
寧老亦未之免耶要當用詩書不諱耳

潛丘  
劉記

禮記錯綜句法

禮記曲禮問國君之富數地以對問大夫之富曰有宰  
食力問士之富以車數對問庶人之富數畜以對其間

數車之對獨轉其語曰以車數對此古人錯綜文體左傳曰我之不共魯故之以曰是昆吾稔之日也侈故之以倒用文勢如此下語此與匈奴傳必我也為漢患者

同一句法

野客叢書

### 廢業

南史徐爰頗涉書傳尤長於傳會世祖崩公除后晉安王子勛侍讀博士詔爰宜習業與否爰答居喪讀喪禮習業何嫌少日始安王子真博士又詔爰爰曰小功廢



業三年喪何容讀書史記其專斷而失訂其是非按朱  
子曰居喪無不得讀書之文古人居喪廢業業是簞簋  
上版子廢業謂不作樂耳古人禮樂不當斯須去身惟  
居喪然後廢樂也故曰喪復常讀樂章周禮司業亦是  
樂官也則居喪讀禮初亦不妨讀書而兩博士意主于  
讀書問發于習業則其問因已繆矣然呂東萊制中下  
帷朱子亦遣其子就學而陸象山毅然非之移書東萊  
謂儼然憂服之中而戶外之履常滿為大人君子之蔽

而近世程篁墩以為即此一事亦可以見二先生尊德性道問學各有所從入而致隆之意若主於陸昔孔子孟子皆常居母之喪今雖無從攷見其講學論道之實而一則以門人治防墓之崩一則以門人敦匠事似亦未嘗謝遣生徒介然守其不語不問之節于三年之中者至于葵魯反齊則亦已非必柱楣之廬矣且夫食蔬飲水固不廢食寢苦枕函固不廢寢繩纓管屨不廢衣服柱楣剪屏不廢居處何讀書而廢之有

金壘子


讀喪禮

案記云君子居喪未葬讀喪禮既葬讀祭禮何謂也曰君子之于禮無弗學也及既祭其事而復習其文者追遠慎終將致其誠信而勿之有悔焉非至此而始讀之也今親始死悲焉懣焉如弗欲生俛而讀禮不已晚乎君子之讀禮也以致其知也非將預擬其親而儲以用之用也禮喪具君子恥具一日二日而可為也者君子弗為也然而有歲制時制月制日制是時雖父母之

終事亦有所不諱也死也者人之必有也而諱之可免乎夫預凶事非禮也至于禮則固有吉凶矣何可廢也唐顯慶之制禮也大臣諱避去國恤焉其後山陵之禮遂無所執夫寺人宮妾之所為愛也非君子之所以事君父也或曰溫公之薨也伊川先生董喪事焉子瞻周視無闕禮乃曰正叔喪禮何其熟也又曰大中康寧何為讀喪禮乎伊川不答邵志元聞之曰伊川之母先亡獨不可以治喪禮乎夫志元之言何如曰覈已獨未若

以吾之言答之也

讀禮  
通攷



經稗卷九